

Interaktiboa eta erretransmititua

Iruñerriko Euskalerrria Irratiak kalera atera nahi du etziko manifestazioaren bidez

Euskaldunok gurea izenburupean, manifestazio «alaia, koloretsua, polita eta entzutetsua» egin asmo du Euskalerrria Irratia Elkartek etzi, larunbata, Iruñean, irati lizentzien erabakian euskaldunon eskubideak «oinperatuta» gelditu direla-eta. 'Mani-festa-zioa', gainera, interaktiboa eta autoerretransmititua izango da.

Alberto Barandiaran / Iruñea

NORK bere irratia eraman, zenbat eta handiagoa hobe, eta manifestazioa irratsaio handia bihurtu. Hori da kontsigna. Nafarroako euskaltzale guztien elkartasuna jaso duen etziko manifestazioaren bidez Euskalerrria Irratia Elkartek kalera atera nahi du irratia, eta manifestazioaren beraren bihotzera eraman. Erakutsi asko direla eta hots handia atera, entzun dezaten.

«Haserre egoteko arrazoiak baditugu, baina pozik gaude euskara aurrera doalako, atxikimendu asko iritsi zaizkigulako. Beraz, giro alaietan egin nahi dugu larunbateko ekitaldia, poztasun hori erakusteko». Mikel Cunchillos Euskalerrria Irratia Elkarteko kideak azaldu zuen irratia lizentziarik gabe uzteko erabakia ezagutu zutenetik elkartean duten gogoak.

Horregatik, errebindikazioa ahaztu gabe ere, jai giroan egin nahi dute elkartekoek etziko. «Euskara gorantz doan balioa da», esan zuen Mikel Bujanda irratiko zuzendariak. «Euskara gero eta estimatuagoa da, eskaera handia dago toki guztietan ikasteko, eta hori guztia ikuspuntu ideologiko ezberdina duen jendearen artean». Horren inguruan, manifestazioa benetan zabala izatea nahi dute antolatzaleek. «Dei egiten diogu nafar gizarte osoari, ez bakarrik euskara ezagutu eta maite duen jendeari, bai eta inpartzialtasun eta zintotasuna duen jendeari ere».

Epaia ezagutu zenetik erreazio eta atxikimendu sorta mardu-



Euskalerrria Irratiaren alde Iruñean egin manifestazioa.

ARTXIBOKOA

la jaso da irratian. Publikoki agertu direnen artean gogoratu besterik ez zortzina alderdi eta sindikatuk bat egin dutela deialdiarekin, hala nola Gazteriaren Kontseiluak, Euskaltzaindiak, Eusko Ikaskuntzak eta Vianako Printzea kultur saria jaso duten azken hirurek. Horiekin batera, hamaika talde, elkarte eta erakunde. «Honek guztiak babes-tuta gaudela sentiarazten gaitu» esan zuen Bujandak.

Manifestazioa arratsaldeko 5:00etan abiatuko da Iruñeko Autobus geltokitik, eta dantzariak, erraldioak, zantzarriak, txarangak izango dira bertan. Hasieran pankartak eta haurrak joango dira, gurasoekin batera. Atzerago, jendearen artean tarteak, dantzariak eta musika taldeak, txistulariak eta gaitariak. Bukaeran, Gazteluko Plazan larrain-dantza interpretatuko da.

Manifestazioan zehar, Euskalerrria Irratiak Airean izeneko saioa erretransmitituko du, bertan gertatzen denaren berri emanez, eta soinu dantzagarriak -kalejirak, korrika-dantzak, ingurutzakoak aieratuz. Informazioa emango da, eta, behar izanez gero, baita zerbitzua ere, bertan egongo den unitate mugikorrarekin eta manifestazioan zehar barreiatuta izango diren kazetarien bidez.

Lizentzien tramitazioa ez da geldiarazi

GOBERNUAK ez du irratia lizentzien tramitazioa geldiarazi, Legebiltzarrak besterik agindu arren, eta lehendakariorde Rafael Gurreak prozesua aurrera doala azaldu zuen herenegun. «Sustapen Ministerioak lizentzien emateak baietsi behar ditu orain, eta burokraziak dena mantsotzen badu ere, hau badabil», esan zuen irratia kate batean. Parlamentuko gehienek hartutako erabakia UPNko gobernua mes-

prezatzen du, eta bitartean ez dago argi zeinek erabakiko duen azkenean Jose Ignacio Pascosen erabakia legearen arabera izan zenetz. Jakina denez, Legebiltzarrak onartu zuen lehiaketaren txostena Kontuen Ganbarara bidaltzea, horrek epaia eman zezan. Orain, eta lanean hasi baino lehen, erakunde horrek idazkia igorri dio Parlamentuko mahaia-ri, horrek erabaki behar duen gai honen ingu-

ruan zalantzak dituela azaltzeko, «epaitu behar delako ekintza administratibo bat legearen arabera izan ote zen, eta gure eremua komunitate foraleko arlo publikoaren finantza kudeaketaren epaia delako». Alegia, ez duela uste lan hau berak egin beharko lukeenik.

Hori dela-eta, legebiltzarrak txosten juridikoa eskatu du afera argitzeko, eta, bitartean, politikariak hasiak

dira erreakzionatzen Nafarroan eskandalu polita sortu duen gai hau ezerezean geldi ez dadin. Atzo bertan, PSNko idazkari nagusiak, Juan Jose Lizarbek, esan zuen Kontuen Ganbara ez dela epaia emateko erakundea, eta azkenean erabakitzen bada eskatu egingo dutela ikerketa batzorde bat osatzeko, «inolakoz zalantzarik izan ez dadin Palaciosek eginiko esleipenaren inguruan». X

Urteko lehen hiru hilabeteetan 41 emakumek tratatu txarrak salatu dituzte Bilbon

■ Otxarkoagan eta Txurdinagan izan da kasurik gehien

Europa Press / Bilbo

JULIA MADRAZO Bilboko alkateordeak eta Isabel Garcés Emakume Saileko zuzendariak atzo azaldu zuten, 41 emakumek salatu dituzte tratatu txarrak Bilboko Udal-tzaingoa urteko lehen hiru hilabeteetan. Kasurik gehien Otxarkoaga eta Txurdinagako auzoetan izan dira -bederatzi bakoitzean-. Bestalde, alpagarria da salaketak jarri dituzten emakumeetatik 11 (% 26) 40 eta 49 urte artekoak direla, eta 10 (% 24) 20 eta 29 artekoak.

Hala ere, adituen arabera tratatu txar guztien %5 eta 10 artean bakarrik salatzen direla kontuan izan behar da. Egoera larri hori ikusita, «neurri politiko eta judizial globalak» hartu behar direla azaldu zuen Isabel Garcések. Gainera, Bilboko Udaletxeak eta Bizkaiko Diputazioak dituzten baliabideak koordinatu beharra dagoela esan zuen Emakume Saileko zuzendariak. X

Adin txikikoei gehiegikeriak egiteagatik Donostian egiten ari den epaiketa bihar bukatuko da

Europa Press / Donostia

ZAZPI adin txikikori gehiegikeria sexualak egiteagatik Donostian egiten ari den hiru gizonen aurkako epaiketa bihar bukatzea espero da. Hiru akusatuek eta zazpi adin txikikoei dagoeneko deklaratu dute, eta hainbat lekuko eta peritu epailearen aurrean agertzea eta alde bakoitzak bere eskaerak azaltzea bakarrik falta da.

Hiru akusatuek epaiketan zehar adin txikikoei sexu harremanak izatea ukatu duten arren, haietako bi, F.J.G.P. oriotarra eta A.V.M. irundarra, kartzelan daude, lehendik ere antzeko delituegatik kondenatu baitzituzten. Oraingo honetan, F.J.G.P.ek aurre egin beharko dio fiskalak bost gehiegikeria sexualengatik eskatzen dituen 27 urteko kartzela zigorrari, edo adin txikikoen prostituzioan laguntzeagatik 20 urteko zigorrari. A.V.M., berriz, lau gehiegikeriarengatik 26 urtera edo prostituzioan laguntzeagatik 20ra kondena dezake. S.C.M. 35 urteko irundarra, azkenik, 14 urteko zigor eskaerari egin beharko dio aurre. X

XOUSE SIMAL



Kuarteletako hiru intsumisio zigortuak

Unai Molinero, Alberto Estefania eta Jose Ignacio Royo intsumisioek 61 eguneko kartzela zigorra bete beharko dute Arakako kuarteleko kartzelan lehenengo biak Mungiako eta azkenak Arakako kuarteletatik desertatzeagatik. Hiru gazteek beren sententziak jaso zituzten atzo goizean Bilboko Gobernu Militarrean, eta gaur aurkeztuko dira atxilotu ditzaten. Jose Ignacio Royok azaldu zuenez, «armaden kontra gaudelako desertatu genuen. Ejerzitoen desagerpena eskatzen dugu, baita gastu militarretara bideratzen den dirutza gizarte gastuetara bideratzea ere».